

RADIO SCIENCE SERIAL  
SUSTAINABLE DEVELOPMENT  
'LIFE MUST GO ON- LIFE JAI THAKI BOLE LAGE'  
FOSSIL FUEL & ENVIRONMENT-  
Mati Niche Te Chola Bole Pa Aro Hawa-Paani  
EPISODE-10

***Discussion about the impacts of fossil fuels by the three passengers. Driver chips in with his idea.***

**Place:** Petrol Pump.

**Scene:** Long cue of cars. Unrest among the crowd. Murmur turns into angry shouts.

**Kevin** - Kinika diesel nai koi ase hah?

**Tia** - Apunar dhamali kuri ase?

**Pump Owner-** Ami dhamali kure nai, ami.....(his words drowned by angry shouts)

**Abi** - Petrol pump malik dhamali kurea nahoi hola? Hosa bi tar diesel nai naki?

**Kevin** - (In frustration) Hoi le bi..... hoi le bi, ami gari tangki te tel dhali bo he lage. Tel na dhali le, ami kinika aro bi tris kms, kinika jabo!

**Tia** - Ami bi enika he ase dae! Ami tu, dui- tin kms he jabo pari bo.

**Abi** - Mon thanda kuri bi. Beya- beya he hoi jai ase. Sop manu gusa hoi ase. Malik ke mari di bo nishina hoi ase.

**Kevin** - Khabo lage tar!

**Abi** - Eman tak tu nako bi nah. Amar khan ki- ki hoile bi, buji joa citizen hobo lage. Haat- hatyar u-thai kena, eku problem bhal hobo nahoi.

**Kevin** - Hoi le bi, tar amar khan laga dikdari hisap nakure toh nah! Yate, amar khan tel na loi le, dusra petrol pump pungchi bole paas kms ako jabo lage.

**Tia** - Apunar hosa koi she. Ami tu bishi mon duk hoi ase.

**Abi** - Gentlemen! ami kiba ekta kobo dae! (R) apunar duijon bi, nijor-nijor gari ke, driver logot rakhi kena, amar gari te he, eki logot jai le kinika? Oh! amar naam tu Abi ase.

**Kevin** - Ami Kevin ase. Kintu, ami duijon kile apunar gari te ahi bo? Apunar nijor ke kile duk pabole bisari ase?

**Tia** - Ami Tia ase dae! Ami tu matha guri ase. Apunar, duijon ke matea tu khushi paishe, hoi lebi, ami aro Kevin raasta mane, ja jaga a-lak, a-lak hobo pare.

**Abi** - Hoi, etu bi ase. Kintu, etea sa hisap te, duijon bi ki kuri bole pari bo? Malik para tu, tel ako pungchi bole, ek konta aro lagi bo koi ase. Duijon, eman deri tak rukhi bole napari bo nishina. Hoi na nahoi? Ami ke dikdar di ase nabhabi bi dae! Kaun nuba din te, ami ke lift dile hoi she.

**Tia** - Achha toh! Kintu, ami, sector 18 jaga te, ek konta bitor te pungchi bole lagi ase.

**Kevin** - Aro, ami bi, sector 7 te meeting kheta bole lage.

**Abi** - Thik ase, eku dikdar nai. Duijon laga driver ke koi di kena ahi bi. Amar khan rukhi thaki bole kam nai. Duijon ke jaga- jaga te pungchai di bole ami tel tu ase. Ami line te thaka tu, tel reserve te thaka u-thai dibole thakea he ase.

**Kevin** - Ummm.... achha! ami ke ek minute di bi.

**Tia** - Ami ke bi.

**Abi** - (Talking to herself)Amar khan dikdar lok pa somoi te, asani para raasta pabole jaga nadi khi jai.

**Driver** - Madam, ami ke koi ase?

**Abi** - Nai, nai, amar mon bhabana koi ase.

**SFX: Car door opens.**

**Kevin** - Ahi bi Tia..... **(SFX: Car door shuts)** Aji din tu, gorom ase dae!

**SFX: Car starts & drive s off.**

**Abi** - AC khuli bo?

**Kevi** - Hoi, morom para khuli bi, ami tu pusna para bhorta hoi she.

**Tia** - amar khan laga din bi ki hoi ase? Thanda din thik para khotom he hoa nai, eman gorom!

**Abi** - Hoitoh. Hoi le bi, Scientists khan, ami khan karone ase koi ase.

**Tia** - Ki? Indian manu khan ke dus di ase? Etu Western scientists khan bhal nai dae! Ami khan ke bodnaam kuri bole, ki hoile bi kuri thake. Madam, din ke beya kuri bole, amar khan ki kuri she?

**Kevin** - Tia, mon thanda kuri bi. Madam Abi para, global Warming koa hobo. Scientists khan, sop manuhar khan ke dus lagai ase, khali Indian manu khan ke nahoi.

**Abi** - Aro, u-tu scientists khan te, Indian scientists khan bi ase dae.

**Kevin** - Hoi, climate scientists bishi bhak khan, etea laga global warming tu, manuhar khan para, greenhouse effect akobi barhai dea nimate ase koi she.

**Abi** - Earth te, manuhar khan ki -ki kam kurea he, greenhouse thaki kena thakea ke botli kuri di ase. Ja century te, mati niche te pa fossil fuel, mane-.....chola ba jula bole pa khan - kaala pather aro tel julai dea he, atmospheric carbon dioxide thakea ke bishi hobole di she.

**Kevin** - Etu ki le hoi ase koi le, kaala pather ba tel julea aro chola tu, aakash te, oxygen logot carbon milai loi kena carbon dioxide banai loi, etu nimate ase.

**Abi** - Aro, amar manuhar khan, kheti nimate, industry karone, mati ke sapha, mane gaas- khuri khan kati dea aro, dusra kisim kam nimate ki - ki kurea bi, green house gases u-thi bo di ase.

**Tia** - Apunar duijon bi engineers ase? Nah..... scientists?

**Abi** - (laughs)Nai, nahoi! ami tu, street- raasta te bachha duk te thaka khan ke sa laga NGO kam kure dae. Engineer bi nahoi aro scientist bi nahoi.

**Kevin** - Aro, ami tu stock broker ase. Amar duijon tu, engineer aro scientists nishina dikhe?

**Tia** - Duijon kotha koa hunea hisap te, bishi janea nishina lage.....Toh....

**Abi** - Engineers....! Ha...ha.....ha....ha..... ami jani loi she Tia! apunar, amar duijon laga kotha huni kena alchi hoi ase.

**Tia** - Nai, enika bi nahoi.

**SFX: Sudden brake applied. Car stops.**

**Driver** - (In anger) Etu manu khan kitea bi nabuji bo. Ekta nahoi le ekta te dikdar di thake!

**Tia** - Ki hoishe?

**Driver** - Sabi nah! raasta sop te, shisha tokora bhorta! Ami ek second der brake marea nai koile, amar tyre puncture hobo thaki she.

**Abi** - Amar khan ke bachai she Khris apunar.

**Driver** - Ami a-lop piche kuri kena, u-tu phele para gura bole lage.

**SFX: Car starts, back.**

**Kevin** - Amar khan etea lok pa tu, jai ja, a-lop hapta phele hoishe koile, ki hobo thaki she.

**Tia** - Apunar ki koi ase? Jai ja hapta te ki thaki she?

**Driver** - Sir, ami buji loi she. Kohasa- paani dhunga koi ase nah?

**Kevin** - Hoi, hoi. Phujor dus baji tak te bi, raasta tu dikhi bole bi napari kena thaki she.

**Tia** - Ooo..... hoi! Hodai saal winter te etu he hoi jai.

**Abi** - (Giggles) Ami tu, amar khan u-thuni koa te he ako wapas kobole lagi ase dae. U-tu bi, amar khan nimite he ase.

**Tia** - Fossil fuel - mati niche te jula bole pa khan koi ase? apunar?

**Abi** - Hoi, amar khan laga capital city Delhi ke, loi sabi. Jitea kohasa mosto para city ke bon kuri jabo, aro joldi para sapha hobo etu bi nahoi. Toh..... manu khan bishi duk pai.

**Kevin** - Hoitoh! Etu paani dhunga kohasa ahi jai she koile, school khan bi bon! sop jaga te traffic jam! kam bi na chulea hoi jai.

**Tia** - Kintu, etu bar tu, Diwali bitor te, fire crackers julai dea nimate ase koi she.....

**Abi** - Apunar koa bi thik he ase. Hoile bi, a-sol tu, kaala pather aro diesel nishina fossil fuel karone ase dae.

**Driver** - Madam, Delhi te Doctor ekjon para koa, ami mon te ase. Tar koa tu hoile, Delhi laga hawa kha tu, ekdin te dusta cigarettes kha logot eki ase koi she. Toh..... cigarette kha charea bi laap nai.

**Kevin** - Tar hosa koi she. Saal 2002 para loi kena, 2012 tak te, gari khan, 97% te u-thi kena, pollution aro toxic dhunga bishi ani di ase. Paani dhunga tu, khali ekta effect, amar khan dikhea he ase.

**Tia** - Amar khan ki kuri bole lage? Judi amar khan development - a-ge jabo koile, amar khan gari bishi lage nahoi?

**Abi** - Enika bi nahoi. Hoi le bi, bhal ekta kuri bole pari kena kurea nishina, mane..... etea amar khan nishina.

**Kevin** - Apunar ki koi ase ami na buje.

**Abi** - Etea, amar khan, tinta gari nahoi kena ekta gari te ja koi ase. Pollution namai dea nahoi? Aro etu upor te, etu ke sustainable phele amar khan thaki ase kobo pare.

**Tia** - Apunar koa tu thik he ase. Kintu, amar khan bishi bhak manu nijor gari thaki bole mon hoi. Share kuri bo koa tu, kotha he nai. Monjur nakure.

**Abi** - Nijor gari nathaki bole koa nahoi dae. Sop gari raasta te bira bole naparea din bi thaki bo. U-tu din te, manu laga gari te bohi bole spirit-khushi pai kena bohi bole lage. Aji ami laga gari te, aha kali apunar laga aro kali porson, Kevin laga.....

**Kevin** - Ami monjur ase. Enika hoile, tel bi bachi bo. Oh! apunar laga car tu, hybrid ase?

**Abi** - Diesel aro electricity koi ase koile, nahoi! Hybrid nahoi.

**Tia** - Ami tu hybrid car upor te, a-lop din agot puri sele. Speed kom te, engine bon (off) hoi jai aro car tu, electric motor para he po-lai koi she. Acceleration a-lop lagi le, duita bi kam kure. Etu majote, engine para power bishi cholai di she koile, electric motor powered kuri dea te batteries khan recharge hoi koi kena likhi she. Aro, 1.25 miles tak te jabo le pari bole battery tu dagor ase.

**Abi** - Hoi, ami bi puri she. Bishi daam model ase!

**Kevin** - Apunar hosa koi she. Erika nishina car models khan bishi daam ase, Kaun nu ba manu he kini bole pari bo.

**Abi** - Amar car tu, petrol aro gas, C.N.G. ase.

**Tia** - Compressed Natural Gas bi fossil fuel ase, toh..... pollute kure nahoi?

**Kevin** - Saathi Tia, apunar CNG laga kotha koa tu eman bujea nai ki....., aji kali market te, etu he sorse sapha tel chola gari ase dae. Carbon komti thaka nimite, petroleum para bi sapha dhunga de.

**Abi** - Central Pollution Control Board para saal 2010 te, koa ekta tu, CNG para pola gari khan matter pollution 7% he ase koi she. Capital te, nitrogen dioxide total tu 10% nishina ase koi she.

**SFX: Cell phone rings.**

**Tia** - (Picks up phone) Hello! Huh? Ooo....Achha thik ase..... KIntu kile?..... toh..... tate, amar khan eku kuri bole napari bo toh nah!..... sai sa bo dae! Achha..... thik ase! Bye! Maap dae! office para ase. Ami export agency te kam kure.

**Kevin** - Kiba dikdar hoi she?

**Tia** - Amar khan laga Secy: para aji meeting thaki bole tu, cancelled hoi she koi she. Toh..... (giggles) homoi laga pressure, eku tara- tari kuri bole nai hoishe.

**Abi** - (Laughs) Apunar laga kotha para, ami ki kobo? Khris ke gari rukhi bi kobo?

**Tia** - Kile?

**Abi** - Alop minute rukhi kena, cha khabole.

**Kevin** - Cha? etea?

**Abi** - Apunar ke jabor josh nakuri bo. Hoi le bi, Tia tu homoi pai jai she, aro amar tinjon eki logot ekta gari te jabole parea laga celebration! Toh..... apunar laga dus minute dibole pari le, cha party kuri le kinika? (all laughs)

**Kevin** - (Undecided) Ummm..... Achha! ami dus minute, der hobo koi kena office te message pa thai di bo.

**Abi** - Thik ase! Khris, morom para cha khabole jaga bhal ekta te rukhi bi.

**Driver** - **Achha madam**, paas meters jai le pai jabo Madam.

**SFX: Few secs car sounds then stops. Door opens & shuts**

**Driver** - (A bit louder) Oh didi! cha char glass ani di bi. Ahi bi madam, sirs, yate ahi kena bohi bi.

**SFX: Foot steps of three persons**

**Owner** - Ami ke dui minute di bi. Chulah jula te, eman deri hoa nai. Morom para bohi thaki bi. Ami gorom- gorom cha banai ani di bo.

**Kevin** - (whispers) Chulah julai ase kobole kam he nai. Dhunga para bi jani loi she.

**Abi** - (A bit louder) Didi, apunar laga dhunga tu, enika he hobo koile, ami khan apunar laga cha nakhabo nishina.....;

**Owner** - Madam beya napa bi. A-lop pichot dhunga harai jabo. Ephele ahi kena bohi bi madam, dhunga ephele nahi bo.

**Tia** - Koila! sorse bishi chola fossil fuel. Madam Abi, Chandi Chowk para China tak, sop eki he ase dae.

**Driver** - Sir, apunar China koi sele, ami laga ghor manu ekjon Beijing te a-lop din a-gote, kam pai kena, tar amma ke chithi likhi kena, kohasa bishi thakea para city te thaka manu khan ke ekdom duk dea koi she. Manu khan phojur para mask lagai kena he bahar ahe koi she. Aro, gari chola bi bishi dikdar ase koi kena chithi likhi she.

**Abi** - Hoitoh. China te purikha kurea hisap te, kaala pather 40% tu, PM koi kena janea, beya particle 2.5 China atmosphere te ase koi she.

**Driver** - PM tu ki ase madam?

**Abi** - Yate, PM koa tu, particulate matter ase dae. Jor para pola cars khan particles mihin- chhoto- chhoto chari de nah! etu khan ke koi. Kintu, Khris, apunar gari ke ghaam namarea jaga te rakhi le he bhal hobo naki, nahoi le tu, gari bitor bishi gorom hoi jabo, aro AC bishi lagi jabo.

**Driver - Thik ase madam,**ami etea jai kena rakhi bo Madam.  
SFX: Fast pace

**Kevin** - Ghor te, AC machines, electric gadgets nahoi le ba electric laga ki samaan khan cholai le bi, amar khan ako kaala pather te he wapas jai loi. Hoi na nahoi? Energy upor te eman hala kuri le bi, koila te he bishi depend kure.

**Tia** - Nako bi nah! amar laga Secy: tu, hodai din nishina, newspaper sai thake. Ja kali bi, tar China te kaala pather kiman cholai, etu upor te kisoman figure, ami ke dikhai she.

**Kevin** - Ki laga figure? Ami duijon ke bi koi di bi nah.

**Tia** - Achha! thik ase. Tar para nah! (R) dusra desh sop mili kena kaala pather chola saman tu , China , tar ekela cholai koi she, aro etu jula nimite, tar khan desh te, hawa ke sorse bishi moila aro green house gas u-la bole di ase koi she.

**Abi** - Hoi le bi ami New York Times te purea tu hoile, China khan kaala pather chola nami jai ase koi she. Kitu hoi le bi, kaala pather aro petroleum ke botli kuri bole, energy dagor para kam kuri bole, amar khan umeed kuri bo!

**Kevin** - Etu phele, China khan, a-lak position ase toh. Tar khan, photovoltaic panels cholai kena, solar power produce kurea desh khan te top list te ase, aro etu logot te, kaala pather bishi chola nimite pollution phele bi, sorse bishi wala ase.

**SFX: Cups in trays.**

**Owner** - Chai ani di she dae.

**Abi** - Ah! gorom- gorom cha pungchi she.(SFX: Cups on table) Guun pa hisap te, aadua a-lop dhali she naki?



**Owner** - Hoi Madam.

**Abi** - Bhal ase, kintu, suru phele dhunga para, amar khan a-lop beya lagi thaki she.

**Kevin** - Kerosene he chola bole bhabi bi nah didi!

**Owner** - Ami khan khujis kuri she Saab, hoile bi, kerosene pabole bishi dikdar ase. Ration card bi nai, aro dukaan te tu, bishi daam hoi jai. Ami khan hodai kini bole napare.

**Abi** - Hoi le bi kaala pather bi kine nahoi? Kerosene kini bole napare koile, kaala pather ke kinika kini bole pari she?

**Owner** - Amar khan kuno rokom pare Madam. Apunar khan cha khai lobi dae. Ami kaun nu ba kam ase. Pichete ahi kena Glass khan u-thai lobo.

**Abi** - Achha thik ase.

**Tia** - Apunar hudea, jawab eman dibole mon nathaka nishina ase. Ki kobo duk manu khan, rail yard, aro bikiri kuri bole karone jama kurea jaga khan para, tokora khan u-thai bole lagi jai.

**Abi** - Hoi ho, ami bi jani ase. Kaala pather ke chor bi kure, aro bachha khan ke chor kuri bole pathai. Amar laga projects khan te bi, etu kotha-issue khan koi u-lai thake.

**Tia**- Fuel koa tu he, amar khan ke chuli bole de Madam Abi. Daam u-thi thaka nimite, amar ghor manu khan duk bi pai.

**Kevin** - Aro, yate chai wala didi nishina dhukea manu, bisari- bisari kena chuli ase. Aro.....

**Abi** - Hoi le bi Kevin apunar tar ke kerosene chola bole koi she, kerosene bi hawa- paani nimite beya ekta ase. Global Warming te kerosene bi bhak loi dae!

**Kevin** - (Sips tea) Ami jani ase! ami jani ase ho! Hoi le bi, upai nai toh! Electricity napai kena thaka world population 20% khan nimite, kerosene para julea lamps khan dorkar ase. A-sol kotha koi le, a- go laga reports, estimate- hisap te, electricity nathaka ghor tu ujala kuri bo nimite, liquid fuel, etu bi bishi bhak kerosene, 77 million liters ek saal te cholai koi she.

**Abi** - (Sips tea) Tia apunar bi cha tu khai lobi, bishi bhal cha ase. (R-& sips tea) Gurgoan bi, kerosene para LPG he cholai ase koi kena, ami huni she. Gas connection tu, Pradhan Mantri Ujjwala Yojana niche te di ase koi she.

**Tia** - Hoi na ki....? Etu tu bhal khobor ekta ase. Enika bhal khobor khan tu, cricket aro political khobor khan para miti jai.

**Owner** - Madam cha tu khushi pai she na nai?

**Abi** - Bishi bhal thaki she..Meetha para khai she.

**Kevin** - Ami para cha kha daam di bo.

**Abi** - Nai, nai...Nai! ami para khelai ase dae. (aloud) Khris! apunar cha kha khotom hoi she? Hoishe koile, jabo lage.

**Driver** - Hoishe Madam. Ahi ase.

**Kevin** - Hoi, amar khan jabo lage.

**SFX: Car door opens, shuts, car starts & drives off.**

**Abi** - Amar khan meetha para cha khai loi she etea, gaana huni bo dae!  
(R)

**SFX: Song for few minutes & let conversation continues.**

**Kevin** - Madam Abi, apunar etea sa tu ki kagoz ase?

**Abi** - Oh etu? (R) etu tu, purana local issue thaka laga ase.

**Kevin** - Ami ke ekbar di bo? Piche phele headlines, ami thik puri bole napare, bhal hobo nishina.....,

**Abi** - Ha, sai sabi.

**Kevin** - (Paper sound, read slowly) Hmmm..... yate koi ase. umm.... French aro British capitals, etu hapta, air pollution ekdom u-cha level te ase aro thanda- winter te kohasa- paani dhunga najai koi likhi ase. Paris Mayor para, diesel cars khan ban kuri bole mon ase koi ase.

**Tia** - December moina laga kotha ase nah? (R) Ami etea bi mon te ase, Paris bi Delhi nishina, raasta te gari bishi ke komti kuri bole odd aro even numbered cars upor te experiment kuri ase.

**Abi** - Hoitoh! London bi, paani dhunga- kohasa bishi hoi thaka jaga ekta ase. 1952 Great Fog ke kaun pahuri bo?

**Tia** - 1952 te ki hoi she? Ami ke bi koi di bi nah jani bo mon ase.

**Abi** - Hawa nathaka, thanda season bitor ase, pollution- airborne pollutants jama, etu bi bishi bhak kaala pather chola nimate hawa moila kuri di kena, city pu-ra te, mosto kohasa layer banai kena, sop jaga pollute kuri she.

**Kevin** - Hoi, hoi, paas di enika he thaki she aro din botli hoi kena tu, phot harai jai she.

**Tia** - Toh..... aji kali tu kinika? London tu?

**Kevin** - Yate, kagoz te likhea hisap te, Mayor para, air pollution alert di she koi ase, aro drivers sop ke, nijor cars khan ghor te rakhi bole koi she.

**Tia** - Khoi! ami bi ekbar sai sabo! Ummm..... Yate koi ase.... bishi bhak pollution tu, car khan para ase, etu bi diesel cars. Nitrogen dioxide 95% u-lai koi ase dae.! Etu nimate, Mayor Hidalgo para, Paris te aji para raasta te, gari aadha ke bira bole ma-na kuri she.

**Kevin** - Aro etu bi sabi! British newspapers khan, French jaga phele para hawa ekdom moila ahi ase koi kena blame kuri ase.

**Abi** - (Laughs) Etu British- French blame khel tu jai thaki bo, kitea hoi le bi.

**Tia** - Hoi le bi, etu kohasa- smog tu kinika bana u- lai jai?

**Abi** - Umm..... Science tu enika ase,..... paani dhunga- kohasa tu, gham, nitrogen oxides aro atmosphere te organic compounds uri bole parea khan, chemical reaction hoa para banai loi, aro etu he ako airborne particles- hawa te chhoto- chhoto, mihin particles aro mati-ground level ozone te bana u-lai loi.

**Tia** - Ozone? ami hunea tu hoile, atmosphere te, Ozone tu, ekdom u-cha high level ase, enika huni she, aro gham para beya rays khan para, amar khan ke bachai koi she. Mati level bi ase nah? Umm..... Interesting ase.

**Kevin** - Hoitoh! Interesting ase. Mati- ground level Ozone tu, thik mati upor te, color- rang nathaka aro ekdom hili bole he thaka gas para bana hoi. Etu ke, Secondary Pollutant bele mate, kile mane, jitea gham aro hawa jama hoi kena thaka, Primary Pollutants reacts hoi jai, titea etu u-lai jai.

**Abi** - Primary Pollutants khan tu, nitrogen oxides aro volatile organic compounds ase.

**Tia** - Etu mane..... ako cars khan he ase nahoi?

**Abi** - (Laughs) Mon chinta nahobi nah Tia..... nitrogen oxides 95% tu, manuhar khan, kaala pather, gasoline jula aro motor gari khan, ghor khan te, industries aro power plants khan te, tel chula nimate hoi koa tu hosa ase, misa nahoi.

**Kevin** - Aro, manu khan para chulai kena volatile compounds tu a-sol kut para hoi koile, gasoline combustion, upstream oil aro gas production, aro liquid fuels, solvents khan laga dhunga para ase.

**Tia** - Etu ozone tu amar khan nimate bhal nahoi nah?

**Abi** - Hoitoh! manu gao nimate bhal nahoi. Moina, saal napungchi kena morea bi thake. Aro asthma symptoms bi thake.

**Kevin** - Gaas- paat aro kisoman anach khan ke bi choi dea.

**Tia** - Aya.....! kinika hobo! jiman gasoline litre chola bo, amar khan laga gao beya kuri ase koile, kinika hobo?

**Driver** - Sir, amar khan sector 18 pungchi ase dae! Apunar ke kut jaga te namai di bo, koi di bi dae!

**Tia** - Achha thik ase, apunar a-lop ako jai le, ami nami bole jaga pungchi bo.

**Abi** - Sabi..... etea- etea tu, apunar office nahoi le dusra jable jaga he nai.

**Tia** - (Laughing) Hosa ase. Kintu, amar khan bishi bhal para kotha- patra kuri she. Etu upor ki kobo. Duijon ke tu, ami najane, hoile bi ami tu laap pai she dae! Petrol pump te, tel rukhi ase koile, bhabi sabi toh! gorom te, manu khan laga hala aro nijor bi khong u-thi thaki bole thaki she. (all laughs)

**Kevi** - (Laughs) Hosa ase Tia, apunar koa tu. Ami bi, kisoman bhal points jani loi she. Duijon yate, Madam Abi ke thanks kobo lage.

**Tia** - Hoitoh! Hoitoh! Khris bhai, baya phele jabi dae! Uh! u-ta paata rang building ase nah? (R) tate he rukhi bi.

**Driver** - Achha thik ase.

### **SFX: Car stops. Door opens & Close**

**Tia**- Toh..... (smiles) ami tu, office nahoi le dusra jable jaga nai(Kevin & Abi laughs)toh...(laughs)jable he lage. Khushi pai she upor kobole eku nai, Madam Abi, saathi Kevin, thanks dae! Ako lok napa tak duijon bi bhal thaki bi.

**Abi** - Apunar bi bhal thaki bi Tia.

**Kevin** - Tia, aji din upor, amar khan napahuri kena thaki bo. Aro nah! (R) apunar laga Secy: khobor te mon di thaka ke bi, aji amar khan kotha koa khan ji hoi le bi tar ke bi koi di bi dae! (All laughs)

**Tia** - (Laughs & says) Achha thik ase, koi di bo. Toh dae!

### **SFX: Car drives off.**